

14.06.2019.

Podrška Vlade ići će u pravcu stvaranja boljih uslova za poslovanje privrednih subjekata



U nastavku posjeta lokalnim privrednim subjektima, Vlada Bosansko-podrinjskog kantona Goražde, na čelu s premijerkom Aidom Obućom danas je posjetila firme „Emka Bosnia“ d.o.o. i „EBI“ d.o.o. Goražde.

Riječ je o radnim posjetama Vlade koje će biti upriličene svim većim privrednim subjektima na području kantona, a čiji je cilj upoznavanje s problemima privrede i sagledavanje mogućnosti za podršku Vlade u njihovom rješavanju.

– Ove današnje sastanke, kao i jučerašnje ocjenjujem kao kvalitetne iz razloga što je prije svega bilo upoznavanje sa novom Vladom BPK Goražde, a nakon toga razgovarano je konkretno o projektima na kojim ćemo zajedno raditi. Ono što je generalni zahtjev privrede jeste da Vlada bude servis u smislu podrške privredi kako bi smo ostvarili naš zajednički, cilj a to je prosperitetan i ekonomski održiv Bosansko-podrinjski kanton Goražde.



Osim intervencija na određena zakonska rješenja u oblasti privrede i privrednih subjekata te privrednim podsticajima u ovoj godini, razgovarano je i o drugim temama od značaja za poslovanje privrednih društava, a jedno od njih je i kvalifikovana radna snaga.

– Do sada smo imali dualni sistem obrazovanja koji je tretirao završne razrede srednjih škola, a ono, na šta privreda ukazuje kao na potrebu, jeste da se taj dualni sistem počne primjenjivati od prvog razreda u srednjim stručnim školama kako bi se tokom četvorogodišnjeg srednjeg obrazovanja učenici u potpunosti osposobili za samostalan rad u privrednim subjektima. Dakle,

ima prostora za nova upošljavanja, ali se mora obratiti pažnja na kvalitetniji obrazovni sistem, u smislu uvođenja više prakse od prvog razreda srednje škole – kazala je premijerka.



Rasterećenje privrede, u smislu smanjenja određenih taksi i naknada, također je bila jedna od tema o kojima se razgovaralo.

– Mi imamo par zakona koji se donose na nivou kantona kada su u pitanju parafiskalni nameti, a danas i juče smo pričali o tim zakonskim rješenjima. Ono što smo zajednički dogovorili jeste da će se napraviti jedna kvalitetna analiza trenutnog stanja i projekcije koja bi išla u smislu izmjene tih zakonskih rješenja – pojasnila je premijerka Aida Obuća.



